

Morning Regional Dogri News Bulletin, 07th June 2024

मार्निंग डोगरी न्यूज़ बुलेटिन, समें. 09-20 Hrs

<><><><><><>

एह आकाशवाणी जम्मू ऐ, बड्डलै खबरें च तुंदा सुआगत, पैहले खास-खास खबरें कन्नै में प्रोमिला जम्वाल।

Headlines

1. मुख् चुनां आयुक्त राजीव कुमार होरें आखेआ जम्मू कश्मीर दे लोकें गी तौले गै अपनी सरकार चुनने दा मौका थ्होग।
2. केन्द्र च नमीं सरकार बनने शा पैहले गल्लै-कत्थें दे व्यापक दौर चला'रदे न। अज्ज एनडीए पार्लिमानी पार्टी दी मीटिंग लगगोग।
3. उपराज्यपाल मनोज सिन्हा होरें आखेआ जे जम्मू कश्मीर दे नोजवानें प्रदेश गी नमिएं उंचाइएं तगर लेई जाने दा धैइया कीते दा ऐ।
4. जम्मू कश्मीर पैहली-पैहली एडवेंचर द्रौड़ ते अंतराश्ट्रीय मेराथान दी मेजबानी करोग।
5. कल जम्मू कश्मीर स्कूली शिक्षा बोर्ड आस्सेआ घोषत 12मीं जमातै दे नतीजें च 74 प्रतिशत विद्यार्थी सफल रेह।

<><><><><><>

JK-Election

मुख् चुनां आयुक्त राजीव कुमार होरें आखेआ ऐ जे आयोग तौले गै जम्मू कश्मीर दे लोकें गी सरकार चुनने दा मौका देग। जम्मू कश्मीर च विधानसभा चुनां होने न। मुख् चुनां आयुक्त होरें आखेआ जे 12 मार्च गी जम्मू कश्मीर दे दौरे दरान उनें इस गल्ला दी सारत दित्ती ही, इत्थें चुनां सेई समें पर करोआए जांगन। उनें आखेआ जे जम्मू कश्मीर च होने आले चुनाएं च ओह चांहे न जे लोकें खरी मती गिनतरी च अपनी शमूलियत गी जकीनी बनान। उनें आखेआ जे हाल च होए दे संसदीय चुनाएं च जम्मू कश्मीर दे लोकें खरी मती गिनतरी च वोट पाए। हुन इत्थुआं दे लोकें गी अपने नुमायंदे चुनने ते सरकार बनाने दा मौका तौले गै थ्होग। इत्थें एह दस्सना लाजमी ऐ जे जम्मू कश्मीर च इस बारी होए दे मतदान नै पिछले 4 दहाकें दा रिकार्ड त्रोड़ेआ ऐ। जम्मू ते उधमपुर लोकसभा सीट पर खरा मतदान होआ। पर बारामुला, अनंतनाग ते कश्मीर च बी इस बारी मतदान फीसद शैल रेई। मुख् चुनां आयुक्त राजीव कुमार होरें एहदे थमां पैहले आखेआ हा जे

जम्मू कश्मीर च विधानसभा चुनां पार्लिमानी चुनाएं दे मगरा होंगन। सुप्रीम कोर्ट नै चुनां आयोग गी जम्मू कश्मीर च विधानसभा चुनां 30 सितम्बर 2024 थमां पैहले करोआने दियां हिदायतां दित्तियां हियां। जम्मू कश्मीर च पिछले विधानसभा चुनां 2014 च हेए हे। जम्मू कश्मीर च विधानसभा दियां 90 सीटां न ते 24 सीटां पाकिस्तान दे नजैज कब्जे आले जम्मू कश्मीर लेई आरक्षत रक्खियां गेदियां न। मुख् चुनां आयुक्त राजीव कुमार ते चुनां आयुक्तें ज्ञानेश कुमार ते सुखबीर सिंह संघु होरें लोकसभा चुनां जित्तने आले मेदवारें देनां राष्ट्रपति द्रौपदी मुर्मू होरें गी सोंपे।

<><><><><><>

NDA Govt.

राष्ट्रीय जनतांत्रिक गठबंधन एनडीए त्रीह बारी सरकार बनाने दी तैआरी करा'रदा ऐ। राष्ट्रीय राजधानी दिल्ली च सियासी गतिविधियां तेज होई गेइयां न। बीजेपी ते जनता दल यूनाइटेड दे नेता बक्ख-बक्ख बैठकां करा'रदे न। अज्ज नमीं दिल्ली च एनडीए संसदीय दल दी बैठक च बीजेपी, टीडीपी, जेडी(यूनाइटेड), एलजेपी, शिव सेना(शिंदे गुट), जेडी(एस) ते एनडीए दे होरने भ्याल पार्टिएं दे नमें चुने दे सांसद शामिल होंगन। राष्ट्रीय जनतांत्रिक गठबंधन एनडीए संसदीय दल दी बैठक शा पैहले अज्ज बडलै जनता दल यूनाइटेड संसदी दल दी बैठक बी लग्गा'रदी ऐ। बीजेपी दे अध्यक्ष जे.पी.नड्डा ते केन्द्रीय मंत्री राजनाथ सिंह होरें गी मंत्रिमंडल दे गठन पर एनडीए दे सैहयोगिएं कन्नै चर्चा करने दी जिम्मेदारी दित्ती गेइ ऐ। नड्डा होरें कल बीजेपी दे वरिष्ठ नेताएं ते केन्द्री मंत्रिएं दे कन्ने लग्गी बैठकां कीतियां। बैठक च केन्द्री मंत्री अमित शाह, राजनाथ सिंह, पीयूष गोयल, प्रहलाद जोशी, मनसुख मांडवीया ते अश्विनी वैष्णव हुंदे कन्नै कन्नै बीजेपी दे राष्ट्रीय महासचिव तरुण चुग ते विनोद तावडे हुंदे सनें होर बी लोक शामिल होए। जेडीयू दे केई नेताएं पार्टी अध्यक्ष ते बिहार दे मुख्मंत्री नितिश कुमार हुंदे कन्नै बी नमीं दिल्ली च मलाटी कीती।

<><><><><><>

Rahul Gandhi

कांग्रेस नेता राहुल गांधी होरें 4 जून गी शेयर बजार च आई दी गिरावट दी संयुक्त संसदीय समिति जेपीसी थमां जांच कराने दी मंग कीती ऐ। नमीं दिल्ली च कांग्रेस मुख्यालय च गांधी होरें आखेआ जे बजार च गिरावट करी खुदरा निवेशकें गी 30 लक्ख करोड़ रपे दा नुक्सान होआ। कांग्रेस नेता होरें आखेआ जे ओह जानना चांहदे न जे प्रधानमंत्री ते गृहमंत्री होरें शेयर बजार च निवेश करने आले5 करोड़ परोआरें गी खास निवेश दी सलाह कीह दित्ती। तोआई बीजेपी नै कांग्रेस दे दावें दा खंडन कीता ऐ। नमीं दिल्ली च वरिष्ठ बीजेपी नेता पीयूष गोयल होरें दोष लाया जे राहुल गांधी बजार दे निवेशकें गी धोखा देने दी कोशश करा'रदे न। गोयल होरें दावा कीता जे चुनां दे नतीजे आले दिन बी लोकें गी फायदा होआ।

<><><><><><>

LG-Youth

उपराज्यपाल मनोज सिन्हा होरें कल आखेआ जे साढ़े नोजवानें दी ताकत कन्नै जम्मू कश्मीर दे इक समृद्ध ते खुशहाल भविक्ख दा निर्माण होआ करदा ऐ। उनें आखेआ नोजवान साढ़ी सब्बने शा बड्डी ताकत न ते उनें जम्मू कश्मीर गी उंचाइए पर लेई जाने दा धैइया कीते दा ऐ। उपराज्यपाल कल बडगाम च एनआईएफटी दे ओमपुरा कैपस च दऊं दिनें दे यूथ उत्सव सपैक्ट्रम-24 दे उदघाटन मगरा बोला'रदे हे। श्री सिन्हा होरें एनआईएफटी श्रीनगर गी कश्मीर घाटी दे विद्यार्थिएं गी अपनी छप्पी दी योग्यता ते प्रतिभा दा पता लाने ते उनें गी कला, खेड्डें, फैशन आयोजनें ते साहित्यिक प्रोग्रामें लेई तैआर करने लेई मुबारकबाद दिक्ती। उनें डिजाइन विकास ते हत्थखड्डी-दस्तकारी ते प्रबंधन क्षेत्र च नोजवानें दा कौशल विकास करने लेई एनआईएफटी श्रीनगर दी भूमका गी बड़ा मता सराह्या। उनें आखेआ पिछले 4-5 ब'रें च दस्तकारी ते हत्थखड्डी आले सेक्टर च बड़ी बड्डी क्रांति आई ऐ। उनें विद्यार्थिएं गी जम्मू कश्मीर दी सगोसार ते दस्तकारी आली परम्परा कन्नै खरी चाल्ली वाक्कु होने लेई आखेआ तां जे ओ नमें ते मोलिक बचारें कन्नै बक्ख-बक्ख वर्गे च हत्थखड्डी ते दस्तकारी विभाग गी सैहयोग देई सकन।

<><><><><><>

CS-Kisan App

मुख्य सचिव अटल डुल्लू होरें कल श्रीनगर च जम्मू कश्मीर प्रशासन ते अंतरिक्ष सरबंधी जियो इनफरमेटिक्स दे भास्काराचार्य राष्ट्रीय संस्थान कन्नै रलियै शुरू कीते गेदे सुचना प्रौद्योगिकी पैहलकदमिएं तैहत हासल उपलब्धिएं दा जायजा लैता। मीटिंग दरान जेके समाधान किसान खिदमत पर ऐप जम्मू कश्मीर यूथ स्किल ते उद्यमिता सरबंधी ऐप दा बी जायजा लैता।

<><><><><><>

Health Heat

सेहत मंत्रालय नै राज्यें ते केन्द्र शासत प्रदेशें कन्नै बैठक लाई ते अस्पतालें च अगग लगने आली घटनाएं थमां बचाह सरबंधी तौर तरीकें पर चर्चा कीती। बैठक दी अध्यक्षता सेहत सेवाएं सरबंधी डीजी डॉ. अतुल गोयल होरें वर्चुअली कीती। इस दरान अगग ते होर सरबंधी घटनाएं पर काबू पाने ते सेहत सरबंधी दिक्खभाल आली सुविधाएं गी अपनाने बारे बचार बमर्श होआ। बैठक च इस गल्ला दी जानकारी दिक्ती गई, राज्यें ते केन्द्र शासत प्रदेशें दे उच्च सतह दे अधिकारी स्थिति पर तक्क रक्खा'रदे न।

<><><><><><>

JK-Adventure

फारमुला-4 कार रेस दी सफल मेजबानी मगरा हुन जम्मू कश्मीर अपने पैहले पैहले मेराथान ते रोमांचकारी द्रौड़ लेई तैआरी करा'रदा ऐ। कल सिविल सचिवालय श्रीनगर च लग्गी दी इक बैठक दी अध्यक्षता करदे होई मुख् सचिव अटल डुल्लू होरें एह जानकारी दित्ती। मुख् सचिव होरें आखेआ जे कश्मीर च इस विश्व-सतह दी आदर्श मेराथान ते एडवेंचर द्रौड़ करोआने दी हर चाल्ली दी समर्थ मजूद ऐ। उनें आखेआ रोमांचकारी खेड्डें दे आयोजन कन्नै साढ़े नोजवानें गी राश्ट्रीय ते अंतराश्ट्रीय सतह पर खेड्डेने लेई मंच हासल होंगन। उनें मार्च 2024 च श्रीनगर डल झील दे कंडे पैहले-पैहले फारमुला-4 कार शो दे सफल आयोजन बारे बी गल्ल कीती। उनें सरबंधत अधिकारिएं गी कश्मीर च अंतराश्ट्रीय मेराथान दे आयोजन लेई रूपरेखा तैआर करने ते समेंब0 तरीके नै लक्ष्य हासल करने दी ताकीद कीती। उनें आखेआ जेकर सब किश योजना बद्ध तरीके कन्नै तोड़ चाढ़दा ऐ तां इस बारे अक्टूबर म्हीने कश्मीर च ते मार्च 2025 च जम्मू च मेराथान दा आयोजन कीता जाग। एह आयोजन माकूल मौसम दे कन्नो कन्नी आयोजित कीते जांगनं उनें अधिकारिएं गी आखेआ जे ओ इस मेराथान च दुए मुख् दे खडारिएं दी मती शा मती शिरकत जकीनी करन। उनें आखेआ रोमांचकारी खेड्डें दे आयोजन कन्नै सैलसफे ते स्थानीय बपार दे बधने कन्नै जत्थें इक पास्से आर्थिक विकास होना तैह ऐ तोआई दुए पास्से जम्मू कश्मीर, वैश्विक सतह पर इक मननी दी रोमांचकारी खेड्डें आली थाहर बी बनी जाग।

<><><><><><>

12 Result

जम्मू कश्मीर स्कूली शिक्षा बोर्ड आस्सेआ कल यूनीफार्म अकैडमिक केलेंडर तैहत 12मीं जमातै दे सलाना नतीजे कड्डे गे। जम्मू कश्मीर च पूरा पराता पास प्रतिशत 74 फीसद रेआ। इंदे च 77 प्रतिशत कुड़ियां ते 72 प्रतिशत जागत विद्यार्थी शामिल न। अधिकारिक सूत्रें मूजब कुल 73 ज्हार 340 विद्यार्थिएं चा 69 ज्हार 585 विद्यार्थी पास होए। इंदे चा डिस्टिंग हासल करने आले 25 ज्हार 435 विद्यार्थी न जिसलै के 33 ज्हार 437 विद्यार्थिएं फर्स्ट डिवीजन, 10 ज्हार 312, सैकंड डिवीजन ते 195 विद्यार्थिएं थर्ड डिवीजन हासल कीती। 22 ज्हार 921 विद्यार्थी रीअपीयर ते 1 ज्हार 37 विद्यार्थी फेल होई गे।

<><><><><><>

DDC-Rajouri

राजौरी दे जिला विकास आयुक्त ओम प्रकाश भगत होरें जल शक्ति अभियान, बरखा दा पानी किट्ठा करने सरबंधी कैच द रेन जतन दी अमलावरी दा जायजा लैता। बैठक दरान उनें जल शक्ति अभियान ते कैच द रेन दी प्रगति दा जायजा लैता ते अधिकारिएं गी मजूदा माली बारे बारे योजना जमा करोआने लेई गलाया। उनें जिले च पानी दे संरक्षण ते बरखा दे पानी गी किट्ठा करने दे जतनें च तेजी आनने पर जोर पाया।

<><><><><><>

DC-Ramban

रामबन दे डिप्टी कमीशनर बसीर उल हक चौधरी होरें कल रामबन बजारै दा व्यापक दौरा लाया ते स्थानीय लोकें कन्नै गल्लबात दे दौर लाए। उनें पब्लिक आउटरीच प्रोग्राम तैहत महत्वै आलिये विकास परियोजनाएं दा बी जायजा लैता। स्थानीय लोकें दिएं मंगें ते समस्याएं गी सुनने मगरा डिप्टी कमीशनर होरें नगर निगम दे मुख कार्यकारी अधिकारी गी रामबन बजार ते खासकरी जिला अस्पताल रामबन अदालत दे अहाते ते दुइएं महत्वै आलिये थाहरें दे आले दुआले सफाई-सुथराई दी पक्की बवस्था करने लेई आखेआ। उनें पार्क आली थाहरें थमां कूडा करकट ते रैंद-खैद चुक्कने दे निर्देश बी दित्ते।

<><><><><><>

